

दिनांक 16.02.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी अंतर्राष्ट्रीय वस्त्र प्रदर्शनी-भारत टेक्स ने दुनियाभर रा नीति निर्मातावां रो मज़बूत मंच बताया।
- केन्द्रीय कृषि राज्यमंत्री भागीरथ चौधरी जैविक खेती अर श्रीअन्न ने बढ़ावो देबा माथे जोर दिया।
- जयपुर मांय क्षेत्रीय राजभाषा सम्मेलन काल –हिन्दी भाषा रा प्रचार-प्रसार ने बढ़ावो देबा वाळी प्रतिभावां रो सम्मान कर्यो जावेला।
- उदयपुर मांय “**वॉटर विजन 2047**” राष्ट्रीय संगोष्ठी-एकीकृत जल संसाधन प्रबंधन माथे चर्चा व्हेला।

प्रधानमंत्री नरेन्द्र मोदी कया के अंतर्राष्ट्रीय वस्त्र प्रदर्शनी भारत टेक्स मांय देश री सांस्कृतिक विविधता रा दर्शन व्हे रह्या है। वे कया के इण रे सागे ही प्रतिभागी 120 देशां री झलक भी प्रदर्शनी मांय देखी जा री है। श्री मोदी आज नई दिल्ली रा भारत मंडपम मांय चाल री अंतर्राष्ट्रीय वस्त्र प्रदर्शनी-भारत टेक्स मांय बोल रह्या हा। वणा दुनियाभर रा वस्त्र उद्योग सूं जुड़्या लोगां अर नीति निर्मातावां ने एक ही मंच माथे ल्याबा वाळा इण वैश्विक आयोजन री सराहना करी।

प्रधानमंत्री कया के टेक्सटाइल हलको देश मांय सब ऊं बत्तो रूजगार रा मौका पैदा करे है। भारत दुनिया रा मोटा निर्यातकां मांय भेळो है। श्री मोदी कया के साल 2030 तांणी देश रा वस्त्र निर्यात ने नौ लाख करोड़ ताई ले जाबा रो लगस राख्यो गयो है। 14 फरवरी सूं सरू व्ह्यो भारत टेक्स एक अंतर्राष्ट्रीय आयोजन है। इण मांय कपड़ा उद्योग हलका मांय कच्चा माला सूं ले र तैयार उत्पादां तांणी री वस्त्र श्रृंखला ने एक प्लेटफॉर्म माथे लायो गयो है।

आदि महोत्सव री आज सूं नई दिल्ली मांय सरूआत व्हे री है। मेजर ध्यानचंद राष्ट्रीय स्टेडियम मांय 24 फरवरी तांणी चालबा वाळा इण महोत्सव रो लगस देश रा जनजातीय समुदायां री सांस्कृतिक विरासत अर माली क्षमता रो जश्न मनाणो है। इण मांय छह सौ सूं बत्ता आदिवासी कारीगर, पांच सौ प्रदर्शनकारी कलाकार शामिल व्हे रह्या है, जो न्यारा न्यारा राज्यां अर केन्द्र शासित प्रदेशां री परम्परावां ने दिखावेला। जनजातीय कार्यमंत्री जुएल ओराम बताया के महोत्सव रे जरिये जनजातीय समुदायां ने बत्तो बाजार मुहैया करवायो जा रह्यो है। इण सूं जनजातीय उत्पादां अर पारम्परिक कलावां ने बढ़ावो मिलेला।

केन्द्रीय कृषि अर किसान कल्याण मंत्री भागीरथ चौधरी काश्तकारां ने देश री आत्मा बताया है। वे कया के भारत कृषि प्रधान देश है अर किसान अर्थव्यवस्था री मजबूत कड़ी है। श्री चौधरी आज बाड़मेर रा गुढामालानी मांय किसान सम्मेलन मांय बोल रह्या हा। बाजरा अनुसंधान केन्द्र मांय व्ह्या इण सम्मेलन मांय श्री चौधरी काश्तकारां ने जैविक खेती अपनाबा अर श्रीअन्न ने बढ़ावो देबा माथे जोर दिया। वे कया के काश्तकारां री उपज परिवहन खातर कृषि मंत्रालय नई पहल करबा जा रह्यो है।

सम्मेलन मांय उद्योग राज्यमंत्री के.के. विश्नोई भी शामिल व्ह्या। इण दौरान कृषि वैज्ञानिक बाजरा री खेती री नई तकनीक, उन्नत किस्मां री खोज अर मिट्टी रा स्वास्थ्य परीक्षण रा बारा मांय जाणकारी दी।

नई दिल्ली रेलवे स्टेशन माथे काल रात व्ही भगदड़ री ऊंचा दर्जा री जांच सरू व्हे गयी है। जांच समिति मांय रेलवे रा प्रधान मुख्य वाणिज्यिक प्रबंधक नरसिंह देव अर प्रधान मुख्य सुरक्षा आयुक्त पंकज गंगवार शामिल है। उत्तर रेलवे घटना मांय मार्या गया लोगां रा घर आळा ने दस-दस लाख रुपया गंभीर रूप ऊं घायलां ने ढाई-ढाई लाख रुपया देबा रो ऐलाण कर्यो है। इण रे इतर मामूली रूप ऊं घायल लोगां ने एक-एक लाख रुपया रो मुआवजो देबा रो ऐलान कर्यो है। इण बीच, भगदड़ री इण घटना मांय मारबा वाळा लोगां री संख्या 18 व्हे गयी है। मरबा आळा मांय 13 महिलावां अर पांच टाबर शामिल है। घटना माथे राष्ट्रपति, प्रधानमंत्री, रेलमंत्री, गृह मंत्री अर रक्षा मंत्री दुःख जताया। राज्यपाल हरिभाऊ बागडे भी हादसा माथे गहरी संवेदना जताई है।

अबे समाचार महाकुंभ सूँ -

प्रयागराज महाकुंभ मांय मोटी तादाद मांय श्रद्धालुआं रे पवित्र स्नान रो सिलसिलो चाल रह्यो है। दुनियाभर सूँ लाखों श्रद्धालु इण भव्य उत्सव मांय शामिल व्हे रह्या है। हाल ताई कोई 52 करोड़ श्रद्धालु संगम मांय पवित्र स्नान कर चुक्या है। वटी ने प्रदेश रा पाली जिला सूँ आज दिव्यांगजन रो जत्थो भी प्रयागराज खातर रवाना व्ह्यो।

महाकुंभ मांय आज **आस्था और जलवायु परिवर्तन** विषय माथे एक सम्मेलन राख्यो गयो। इण मांय कार्बन उत्सर्जन कम करबा अर हरित ऊर्जा ने बढ़ावो देबा माथे चर्चा करी गई।

जयपुर मांय काल क्षेत्रीय राजभाषा सम्मेलन व्हेला। गृह मंत्रालय रा राजभाषा महकमा री कानी ऊं ओ सम्मेलन मध्य, पश्चिम अर उत्तरी हलका कानी ऊं भेळा मांय राख्यो जा रह्यो है। गृह मंत्रालय री संयुक्त सचिव डॉ. मीनाक्षी जौली आज जयपुर मांय प्रेस वार्ता मांय बताया के इण सम्मेलन रो लगस सरकारी अर प्रशासनिक कामकाज मांय हिन्दी भाषा रा प्रचार-प्रसार ने बढ़ावो देणो है। इण रे सागे ही हिन्दी ने तकनीकी रूप ऊं समृद्ध अर व्यापक बणाबा खातर कर्या गया नया कामां री समीक्षा करणो है।

सीतापुरा रा जेईसीसी मांय होबा वाळा इण सम्मेलन मांय केंद्रीय गृह राज्य मंत्री नित्यानंद राय अर मुख्यमंत्री भजनलाल शर्मा हिस्सो लेवेला। इण सागे ही न्यारा न्यारा महकमा, बैंक अर उपक्रमां रा ठावा अधिकारी मौजूद रेहवेला।

उदयपुर मांय राष्ट्रीय कॉन्फ्रेंस “वाटर विजन-2047” व्हेबा जा री है। केन्द्रीय जल शक्ति मंत्रालय री कानी ऊं 18 फरवरी सूं होबा वाळी इण संगोष्ठी मांय केई राज्यां रा मुख्यमंत्री, जल संसाधन मंत्री अर आला अधिकारी भाग लेवेला। तीन दिन तांई चालबा वाळी इण कॉन्फ्रेंस रो उद्घाटन केन्द्रीय जल शक्ति मंत्री सी.आर. पाटिल करेला। म्हाका खबरनवीस बताया के इण मांय इकीकृत जल संसाधन प्रबंधन माथे भेळा मांय चर्चा करी जावेला।

योग गुरु स्वामी रामदेव आज मुख्यमंत्री भजनलाल शर्मा सूं मुलाकात करी। मुख्यमंत्री रेहवास माथे व्ही इण भेंट मांय योग गुरु प्रदेश मांय आयुर्वेद चिकित्सा पद्धति रा विकास माथे चर्चा करी। वणा स्वस्थ जीवनशैली खातर लोगां ने योग सूं जोड़बा ने कयो। वठी ने उपमुख्यमंत्री दिया कुमारी आज शाहपुरा री नारायण दास महाराज री तपोस्थली त्रिवेणी धाम पूगी। इण मौके वणा प्रदेशवासियां री खुशहाली री कामना करी।

भीलवाड़ा शहर ने हरयो-भर्यो बणाबा खातर मुहिम सुरू करी गयी है। जिला प्रशासन अर राजस्थान प्रदूषण मंडल री कानी ऊं करी गई इण पहल रे तैत आम लोगां ने पर्यावरण संरक्षण अभियान मांय भागीदार बणायो जा रह्यो है। म्हाकां संवाददाता रे मुजब इण खातर डिजिटल प्लेटफॉर्म तैयार कर्यो गयो है।

कोटा मांय राष्ट्रीय सरस राज सखी मेळो चाल रह्यो है। राजस्थान ग्रामीण आजीविका विकास परिषद अर ग्रामीण विकास महकमा री कानी ऊं लगाया गया इण मेळा मांय स्वयं सहायता समूहां री महिलावां आपरा उत्पादां रो प्रदर्शन अर बिक्री कर री है।
